

4
DISSERTATIO MEDICA
INAUGURALIS,
DE

ABORTU.

QUAM,

ANNUENTE SUMMO NUMINE,

Ex Auctoritate Reverendi admodum Viri

D. GULIELMI ROBERTSON, S. S. T. P.

ACADEMIÆ EDINBURGENÆ PRÆFECTI;

NEC NON

Amplissimi SENATUS ACADEMICI consensu,

Et nobilissimæ FACULTATIS MEDICÆ decreto;

PRO GRADU DOCTORATUS,

SUMMISQUE IN MEDICINA HONORIBUS ET PRIVILEGIIS

RITE ET LEGITIME CONSEQUENDIS;

Eruditorum examini subjicit

THOMAS WAITE,
ANGLO-BRITANNUS.

Ad diem 24. Junii, hora locoque solitis.

Parce precor gravidis, facilis Lucina, puellis,
Maturumque utero molliter aufer onus.

OVID.

EDINBURGI:

Apud BALFOUR et SMELLIE,
Academiae Typographos.

M, DCC, LXXIX.

Dr. Haskey

from his humble Servt.

Waite -

Viro illustrissimo

J O A N N I H O P E, M. D.

Botanices in Academia Edinenſi

Profefſori,

In quo ſumma artis propriae notitia,

Et mores in primis amabiles,

Conjunguntur;

Nec non

Fratri ſuo dilectiſſimo

R I C A R D O W A I T E,

Qui ſe amore vere fraterno

Semper eſt proſecutus:

Hanc Diſſertatiunculam Inauguralem,

Obſervantiae ergo,

D. D. C. Q.

A U C T O R.

Digitized by the Internet Archive
in 2019 with funding from
Wellcome Library

<https://archive.org/details/b30791790>

DISSERTATIO MEDICA

INAUGURALIS,

DE

ABORTU.

QUI morbi genus humanum infestant, ii admodum numerosi et metuendi. Non tantum initium vitae, ubi corpus debile et irritabile, igiturque vitiis opportunius, obsident, sed stadiis etiam ejus provectioribus molestiam faciunt, periculumque summum intentant. Sexus vero foemineus, utpote cui solida laxiora et magis irritabilia sint, et partibus utriusque sexus communibus uterus fit adjunctus, pluribus etiamnum morbis, quam masculineus, patere consuevit. Uterus enim, ut omnes testantur scriptores, formidolosae morborum cohortis fons et origo.

Unum autem ex hisce, nempe abortum, exequi nobiscum decrevimus. Cum vero nullius morbi natura, nisi omnia sedem ejus spectantia sint comperta, rite possit illustrari, uterum ipsum, antequam ad inceptum veniatur, depingendum putamus.

SEDES UTERI ET STRUCTURA.

In parte pelvis superiore situs est uterus, vesicam inter et rectum, fundo retrorsum sursumque, cervice antrorsum deorsumque, versis ; lateribus amplioribus rectum et vesicam, angustioribus latera pelvis ipsius versus spectantibus. Lagenam parvulam compressiorem pyrumve, nisi adsit graviditas, plane reddit, ab ore interno tincaeve, uti appellatur, ad partem fundi superiorem tres digitos aut circiter longus, a parte anteriore ad posteriorem unum crassus. Pars autem ejus superior Fundus, inferior vero Cervix, nominatur. Uterus cavo interno instructus est. Quod corporis proprium, id triangulare et pulposum ; quod cervicis vero, cylindricum et callosum, valvulisque parvis abundat. Tres tunicae uteri propriae sunt. Harum autem extima a peritonaeo, quod

et universum abdominis cavum succingit, et totum uterum obducit, manifeste oritur. Altera, Hallero accuratissimo testante, e tela cellulosa, crassa, densa, aliquantulum dura, succulenta tamen, conficitur, in qua fibrae musculares, praefertim in iis quae pepererunt, sese ostendunt, compressae et in modum retis conjunctae. Nonnulli quidem fibras utero musculares ex toto deesse contendunt. Si vero secum reputabunt, quod fibrae musculares uteri propriae non tantum ab anatomicis optimae notae evidentissime fuerunt visae, sed quod uterus vi magna, cui non facile possit obsisti, foetum excludit, brevique a partu, quod sine fibris muscularibus, quae sese contrahendi potestatem ei comparent, non possit incidere, ad formam molemque priorem redit, in sententiam longe aliam haud dubie concedent. Tertia, denique, tunica est epidermidis vaginae propago, quae omnes uteri partes succingit. Uterus in loco suo per ligamenta lata et rotunda continetur. Illa e peritoneo ab utero utrinque discedente conflantur, duas in parte sua superiore plicas, anteriorem et posteriorem, efficientia, et uterum lateribus pelvis adnectunt. Quantum ad haec attinet, e parvulo fibrarum muscularium, nervorum vasorumque plexu composita, et peritoneo

tonaeo inclusa, ante tubas Fallopianas mox describendas descendunt, per annulum abdominis transeunt, semet in adipem inguinis immergunt, ibique evanescunt. In plica ligamentorum latorum anteriore collocantur tubae Fallopianae, duplices, flaccidae, vermiformes, tres digitos aut circiter longae, ab altera parte extrema angulis fundi uterini lateralibus affixae, ibique foramen fetae suillae vix capax habentes. Prout ab utero procedere pergunt, diametro gradatim increscunt, duasque tunicas habent, quarum exterior a peritonaeo oritur, interior iis propria, rugosa, speciem retis prae sese ferens et mucosa longius exteriore patet, et fimbriam *morsumve Diaboli*, uti appellatur, quo os earum apertum tubiforme circumdatur, format. Ab ovariis in cadavere disjunctae reperiri consueverunt; contra, animali subito extincto, eadem nunquam non amplectuntur. In plica ligamentorum latorum posteriore sedent duo corpora ovaria appellata, albida, oblonga, testium masculinorum non dissimilia, in aliis mulieribus forma et magnitudine alia, in iis quae pueros enixae sunt, quam in virginibus, ampliora; membrana a peritonaeo oriunda crassa et hoc in loco propemodum cartilaginosa obducta. Structura eorum uterinam admodum refert,

densa,

denſa, albida, cellulofa, adipis expers. Quin-
 etiam in ovariis virginum, etiam juniorum, bullae
 quaedam five veficulae ſefe oftendunt, e mem-
 brana pulpoſa, quamvis ſatis firma, confeſtae,
 ovariis per fila cellulofa ubique adjunctae, lymphæ
 coagulabili repletæ, quindecim plureſve non-
 nunquam in uno ovario. Hæ pro ovis, quæ
 in ovariis quadrupedum adeo inſignia ſunt, olim
 fuerunt habitæ. Cum quidem gravida fato con-
 cedit, cavum unum ſingulare ſemper notatur,
 quod calicem eſſe, unde ovum fuerat delapſum,
 plurimi exiſtimarunt, corpusque luteum appella-
 tur. Caeterum phyſiologi recentiores hæſce ve-
 ſiculas pro glandulis, quæ ſemen contineant foe-
 mineum, habent, quæ inter coeundum rumpun-
 tur, idque, quod comprehendunt, ſub forma hu-
 moris in tubam effundunt. Nonnihil alicujus
 humoris ex ovariis evidenter excernitur, quod
 ſemini maſculino admixtum per tubam in uterum
 devehî videtur, ibique fundamenta foetus futuri
 jact. Pleraque graviditatis phaenomena hanc
 theoriam firmare videntur. Foetus enim in cavo
 abdominis, utero nulla ex parte rupto, reperti
 ſunt ; et offa per abdomen, utero ex toto integro,
 quod nunquam, niſi foetus rudimentum ab ova-
 riis

riis descendisset, potuisset incidere, viam sibi patefecerunt.

Arteriae uterinae ab hypogastricis et spermaticis oriuntur, et sanguis ad venas hypogastricas, et spermaticas, redit. Nervi a parte plexus mesenterici inferioris ima proficiscuntur. Quinetiam nervuli nonnulli ovariis proprii a plexu renali oriuntur.

Quae haecenus de utero proposuimus, ea hoc viscus non gravidum spectant. Quamprimum vero rudimentum foetus per tubam Fallopianam in cavum uteri descendit, fundo uterino, per fibrillas villosae e superficie sua utero admota extantes, semet adjungit, e quibus villis placenta primum conflare videtur. Postea fit substantia lata, compressa, et spongiosa, superficiei uteri interiori, saepissime prope fundum, firmiter adhaerens, et, uti videtur, e ramis arteriarum umbilicalium et venae undique diffusis composita. In cellulas hujusce placentae spongiosas sanguinem suum effundunt arteriae uterinae, quem, ex hisce cellulis, venulae placentae eodem modo, quo fit in corporibus penis cavernosis, rursus absorbent. Hae tandem collectae venam umbilicalem componunt, quae umbilicum foetus recta petit, partem sanguinis sui in venam portarum, partem ejusdem

ejusdem per canalem venosum in venam cavam inferiorem, effundens. Sanguis a foetu per duas arterias, quae umbilicales appellantur, reduci-
tur. Hae, modo ab iliakis internis, modo ab a-
orta descendente, oriuntur, et cum vena cogno-
mine cursum serpentinum tenentes ope membra-
narum, quae iis circumdantur, chordam, uti vo-
catur, umbilicalem constituunt. Ramis per sub-
stantiam placentae undique diffusis, sanguinem
suum in cellulas hujus tandem effundunt, e qui-
bus venae uterinae eundem rursus absorbent.
Hoc modo sanguis in cellulas placentae constan-
ter effunditur, et non minus constanter absorbe-
tur, et foetus circuitum, qui a matre n^{on} p^{er}ime
pendet, sibi proprium plane habet.

Placenta media crassior est, et gradatim mar-
gines versus tenuior evadit. Undique membra-
nae discedunt, quae sacco absoluto et integro
aquas, funem, foetumque involvunt. Membra-
nae autem sunt tres, chorion nempe spongiosum,
quo placenta utero adnectitur; chorion verum
priore firmitus, laevius, magisque pellucidum; et
amnion, quod admodum tenue et pellucidum est,
et liquorem, qui amnii appellatur, continet, qui
uterum distendit, foetum adversus injurias exter-
nas tutiorem reddit, ne partes hujus diversae con-
crescant

crescant cavet, et meatus, per quos, inter pariendum, foetus elabatur necesse est, lubricat et humectat.

Per primos graviditatis menses, membranae ea, quae comprehendunt, magnitudine longe excedunt; res vero postea, cum foetus mole increvit, longe aliter sese habet.

Uterus, denique, prout foetus increscit, mole augetur; caeterum substantia, quod in primis mirabile, non tenuior evadit.

His de structura uterina caeterisque propositis, naturam quoque haemorrhagiae, cum maenorrhagia et abortus ab iisdem causis proficiantur, et nulla alia re, praeterquam tempore quo invadant, videantur differre, paucis exponendam putamus.

HÆMORRHAGIÆ EXPLICATIO.

Haemorrhagia est vel activa vel passiva. Haec subesse dicitur, si sanguis e parte qualibet, absque impetu humorum aucto, aliisque pyrexiae notis, copiosius solito profunditur, et in morbis ad putredinem vergentibus, ut scorbuto, caeterisque, semet ostendere solet. Illam praecedunt, contra,
partis,

partis, unde sanguis erupturus est, viciniaeve ejus
tensio et plenitudo, et omnia pyrexiae signa, ut
horror et frigoris sensus, deinde calor auctus, pul-
susque arteriarum frequentes, pleni, et duri. San-
guis tandem prorumpit, quod omnia signa modo
posita tollit, aegrotumque ad sanitatem, in tem-
pus saltem, reducit. Causa autem haemorrha-
giae activae proxima, nihil enim cum passiva no-
bis in praesentia, est sanguis in vasis partis labor-
antis congestus, qui iis stimulo est, actionemque
eorum auctam movet, quae ut sanguis per ana-
stomofin vel rupturam tandem effundatur facit.
Causae vero, quae mortales ad haemorrhagiā
proclives efficiunt, sunt plenitudo universa, prava
partium conformatio, et libramen circuitus san-
guinis mutatum. Quomodo prima homines pro-
fusionibus sanguineis opportunos reddat, neminem
potest latere; namque, si omnia corporis vasa
justo pleniora sint, nihil aliud, quam naturam
mole humorum nimia, quod aequae facile erup-
tione sanguinis spontanea ac qualibet alia ratione
fit, semet levaturam esse speres. Qua ratione al-
tera agat, vix opus est ut exponamus; etenim, si
pars nimis angusta est, sanguis per eam difficile
transibit, impetusque adauctus movebitur; et, si
pars justo laxior est, sanguis ibi accumulabitur, et
proclivitatem ad haemorrhagiam plane dabit.

Quomodo tertia causa, libramen nempe circuitus sanguinis mutatum, agat, nunc proximum est ut explicare aggrediamur. Omnes corporis humani partes non aequaliter ab initio vitae usque eodem tempore increfcunt; prius enim aliae partes, deinde aliae, explicari confuerunt. Cerebrum autem est pars prima, quam ex toto absolvendam perficiendamque natura curat, propterea quod fensus motusque reliquarum partium ordine suo et tempore explicandarum ab eo, ut fonte, profiscuntur. Incrementum autem et cerebri et caeterarum partium a plenitudine arteriarum, quae ab ineunte vita ad mediam usque aetatem invalescit, et vasa sanguifera, et igitur reliquas partes, donec summam sibi magnitudinem adipiscantur, gradatim longiores et ampliores efficiens, ex toto pendere videtur. Quae causa sanguinem in arteriis accumulat, et plenitudinem hujusmodi facit, est major venarum, ut experimenta celebris Wintringhamii testantur, firmitas. Si vasa cujuslibet partis, ut cerebri propria, reliquis laxiora sint, ad ea cursus humorum primum dirigetur. Revera quidem major sanguinis quantitas ad cerebrum, quam ad reliquas partes, per aliquot a partu annos, devehit solet, quod fieri pergit, donec

nec vasa ejus tantam firmitatem sibi comparent, quanta impetui hujusmodi potest obistere. Haec autem plenitudo nullos effectus morbosos edit, nisi rami aortae inferioris, quorum impetus sanguinis, pubertate appetente, incipit fieri, difficile tardeque dilatabuntur. Quod si evenit, sanguis e vasis membranae narium laxae fitis, et idcirco ruptu facilibus, profunditur, morbum, quae epistaxis appellatur, faciens. Quamprimum autem cursus humorum ad ramos aortae inferioris est factus, mira ibi praestat; partes enim utriusque sexus genitales, quae adhuc ad munia, ad quae a natura destinantur, obeunda male accommodantur, brevi explicat, et summam magnitudinem viresque procreatrices illis conciliat. Quantum ad uterum virginum attinet; vasa ei longiora redduntur, sanguis in his congeritur, et brevi, actione adaucta excitata, in cavum uterinum effunditur; vel, uti alia verba adhibeam, menstrua proveniunt. Haec evacuatio omnino naturalis sunt, et tantum absunt ut noceant, ut, contra, ad muliebre sanitatem tuendam, plenitudini morbosae occurrendo, magnopere conferant. Si vero diutius justo manent, et ut copia sanguinis nimia effundatur faciunt, haud dubie pro morbo habenda. Quanta sanguinis quidem singulis temporibus,

poribus, quibus mulieres menstruis purgantur, quantitas debeat effundi, pro certo statuere in primis difficile; aliae enim alias sanguinis jacturas facile ferunt. Igitur effectus quos evacuatio edat soli maenorrhagiam adesse demonstrant, velut dorfi, lumborum, ventris, parturientium instar, dolores; potissimum vero totius corporis debilitas, faciei pallor, affectusque artuum inferiorum hydropici. Maenorrhagia autem et abortus, quem sumus executuri, inter sese hac re solummodo differunt, quod illa mulieres, quae non uterum gerunt, hic gravidas, in quibus placentam ab utero disjungit, et foetum immaturum excludit, infestat.

Quantum ad haemorrhagiam generalem attinet, plenitudo in ramis utriusque aortae, a pubertate ad annum aetatis trigesimum sextum, aut circiter, fere aequa est. Deinde ab arteriis ad venas transfertur, quod in causa est cur morbi a plenitudine venosa pendentes aetate proveciores occupent. Quae causae profusiones sanguineas movent, eae sunt quaecunque sanguinis arteriosi progressum venosive reditum impediunt, quaecunque motum sanguinis in toto systemate augent, partesque singulares stimulis nimis acribus afficiunt.

HISTORIA ABORTUS.

Huic diverſa, pro tempore quo inciderit diverſo, nomina indiderunt antiquiores, *effluxum*, nempe, genitura adhuc liquida primo graviditatis menſe expulſa ; ab hoc tempore ad tertium uſque menſem, partu elifo, *expulſionem*, a tertio vero ad ſeptimum menſem uſque exactum, foetu excluſo, *abortum*. In morem vero recentiorum, qui hanc nominum varietatem, ut parum neceſſariam, repudiant, quocunque graviditatis tempore partus elidatur, excluſionem foetus adhuc immaturi *abortum* vocare non dubitabimus. Quae excluſio foetus intra primum menſem incidit, ea nomen Abortus vix meretur, cum nullum ſanguinis profluviū, quod abortum ſemper comitari ponitur, utero rudimento foetus per vaſcula tenuiſſima adhuc adjuncto, ab ea proficiſcatur, cumque igitur in nullo periculo aegrotā verſetur.

Abortus, intra ſpatium a conceptione facta trimēſtre, et eo potiſſimum quo menſtrua provenire conſueverunt tempore, incidere ſolet ; rem vero ita ſeſe habere non eſt cur mireris, ſi tecum reputaveris,

reputaveris, systema foemineum, graviditate non substante, quantitatem sanguinis superfluum, quae singulis mensibus e vasis uterinis ante fuit profusa, quaeque adhuc in corpore foetus parvulo alendo non ex toto potest consumi, parare assuefactum fuisse, et idem etiamnum praestare pergere; et congestionem igitur in vasis uteri propriis talem facile fieri posse, qualis praegnantem abortus periculo plane objicere valet. Caeterum, abortus quoque gravidas, quolibet alio dum uterus geritur tempore, invadere potest.

Quae signa primum sese ostendunt, ea sunt lassitudo, totius corporis inertia, appetitus prostratus, rigor. Hisce succedunt calor, inquietudo, pulsus arteriarum celeres et plerumque duri, dolores lumborum uterique ad inguina usque pertinentes, sanguinis ex utero profusio, partium genitalium externarum frigoris sensus. Mammæ flaccidiores evadunt et subsidunt. Uterus spasmis, alvus tenesmo molestissimo, afficitur. Sanguis coactus, non absque doloribus gravissimis, subinde descendit. E vasis uterinis gradatim magis magisque liberaliter profunditur sanguis. Accedunt animi deliquium, extremorum frigus, capitis dolor, magnae animi perturbationes, vomitio, frigus calorque se invicem excipientia, regio

gio hypogastrica detumescens. Uteri tandem et musculorum abdominis spasmi gravissimi, ut in partu naturali incidit, oriuntur. Membranae disrumpuntur, aquasque effundunt, vel integrae cum ipso foetu simul expelluntur. Dolor quidem sub initium adeo modicus nonnunquam est, ut abortum accedere per profusionem sanguinis ex utero solam possimus novisse. Haec nonnunquam, graviditate provectiore, adeo copiosa evadit, ut vita aegrotantis summo in periculo versetur, nisi statim foetu per opem obstetriciam liberetur. Per primos tamen quinque menses non multum periculi hinc metuendum; vasa enim uterina nondum adeo dilatantur, ut magnam sanguinis et subitaneam effusionem incidere patiantur. Saepe vero tanta est, ut mulierem debilem et laxam, et igitur morbis a debilitate pendentibus, quales sunt leucophlegmatia, anasarca, multique idem genus alii, in posterum opportunior efficiat. Caeterum, per spatium modo dictum, mulier cui partus eliditur sanguinis profusione raro exstinguitur; etenim, quantum sanguinis, absque periculo mortis, possit prorumpere, in primis mirandum. Jactura quidem sanguinis repentina admodumque liberalis periculo minime vacat, quod eo majus, quo magis subita profusio;

namque

namque quantitatem magnam gradatim tardeque, quam multo minorem brevi spatio, amisisse minus nocet.

Omnis ex utero sanguinis profusio non significat abortum instare. Namque aliqua placentae pars ab utero nonnunquam sejungitur, effusionemque sanguinis facit; quae tamen superficiei uterinae internae postea adeo firmiter adhaeret, ut gravida menses ei praescriptos possit exigere. Nonnullis foeminis, quibus corpus justo plenius sit, sanguinem per tres quatuorve primos graviditatis menses profundi, neminem fugit; hic vero non ab utero, sed a vagina, quam vasculis instruunt arteriae iliacae internae vel hypogastricae, proficisci videtur. In hanc sententiam ivit Hoffmannus celeberrimus, apud quem verba sequentia reperies: ‘ Saepissime fit, ut quae sanguine abundant foeminae, secundo et tertio graviditatis mense, sanguineum experiantur fluxum, citra dolores et spasmos in regione lumbari et abdomine, citra debilitatem et praecedentem horrorem aut rigorem partium extremarum; hoc autem in casu, sanguis non ex uteri cavitate, sed potius ex vasculis vaginae uterinae, cum euphoria profluit.’

C A U S A P R O X I M A.

Hanc placentae ab utero separationem esse, omnes causae remotae testantur, quae tales sunt, quales hoc plane praestant. Causae autem quae placentam ab utero dissociant duplices esse videntur: 1. Eae quae impetum sanguinis vasa uterina versus faciunt, quo placenta ab utero facile potest separari. 2. Eae quae tonum vasis uterini, unde nexus uterum inter et placentam pendet, imminuunt, cujus jactura placentam ab utero haud dubie dividit.

C A U S A E R E M O T A E.

I. Eae quae impetum sanguinis vasa uterina versus faciunt, quo placenta ab utero facile potest separari.

a. *Plenitudo Universa*.—Hanc autem faciunt diaeta potissimum plena et nutriens, liquores spirituosus liberaliter adhibiti, et ebriositas. Qui cibis autem corpori plurimum nutrimenti suppeditat

tat et crassamentum sanguinis insigniter auget, est animalis, qui multo minus vegetabili perspirabilis est, et multo parcius tardiusque per meatus urinarios e corpore excernitur, utpote qui magis viscidus sit; igiturque in corpore diutius maneat, et multo plus materiae nutrientis pro mole contineat. Quinetiam, ad plenitudinem creandam plurimum conferunt liquores spirituosi, potissimum e byne confecti, ut cerevisia fortior vulgaris, et ea Londinensis lupulata, quae Anglice *Porter* appellatur, qui quantitatem materiae saccharinae in spiritum ardentem nondum conversae majorem, quam vina, continent; propterea quod fermentationem minus absolutam, quam haec, subierunt. Cerevisiam autem fortiores omnigenam ad corpus humanum saginandum in primis accommodari, ex multorum exemplo abunde patet, qui admodum macilenti spatio non longo usu ejus pinguedinosi evadunt. Quae vina parum fermentationis subire solent, quibusve fermentatio suppressa fuit, ea aliis magis, sed minus liquoribus e byne paratis, nutriunt. Caeterum, corpus potentiore stimulo, quam hi, afficere consueverunt; et igitur impetum adauctum diathesinque phlogisticam, facilius movent. Quaecunque mulieres autem tempus in liquoribus spirituosis forbillandis consumunt, ignaviae quoque,

quae

quae omnes secretiones et excretiones imminuit, et ita plenitudinis ortui favet, deditae, eae nec plenitudine nec diathesi phlogistica, quae eam vel comitatur vel brevi subsequitur, carebunt. Plenitudo universa orta, uti omnes norunt, corpus ad haemorrhagias proclivius efficit. Cum vero natura mole humorum nimia oppressa et degravata semet ipsam, graviditate non substante, sanguine ex utero profuso levare consueverit, impetum quoque ejusdem in praegnantibus vasa uterina potius, quam quaelibet alia versus, factum iri a priori judicares. Et rem ita sese fere constanter habere, experientia omnium manifeste testatur. Quaecunque gravidae igitur plenitudine morbida, unde unde fuerit nata, praesertim si ei accesserit calor nimius externus, qui humores magis quam solida rarefacit et expandit, laborant, eae abortu plane evidenterque periclitantur.

b. *Nisus totius corporis violenti.*—In his musculi arterias sibi vicinas, et inter suas fibras repentes, aliqua ex parte comprimunt; et igitur impetum sanguinis eas partes versus, ubi ei venienti minus obstititur, faciunt. Hic vero, praesertim si musculi abdominales una cum reliquis violenter agent, uterum versus potissimum fiet, qui

qui eo tempore reliquis partibus ob situm suum laxior est, et idcirco ad quantitatem sanguinis insolitam recipiendam melius accommodatur.

c. *Corpus universum casibus violenter concussum.*—

Quae corpus hoc modo concutiunt, ea haud dubie sanguinem inferiora corporis versus copiosius solito depellunt. Exemplum enim novimus, ubi, puella e fenestra partis aedium superioris in plateam delapsa, sanguis artus inferiores versus tanta vi propulsus est, ut complures crurum, nullis ossibus fractis aut magnopere laesis, venas disrupit. Igitur concussiones corporis violentae tantum humorum ad uterum cursum facere possunt, quantus placentam ab eo avellere valet. Concussionem hoc revera praestitisse ex Hippocrate discimus, qui Cantatrici gravidæ “ ut in terram desiliret persuasit, cui, quum jam septies desiluisset, genitura in terram defluxit, et fiebat sonitus.”

d. *Ictus abdomini inferiori illati ejusve contusiones.*—Quomodo contusiones ictusve graves cuilibet parti illati agant, intellectu minime difficile. Namque per stimulum, quo partem laesam afficiunt, cursum humorum eam versus faciunt, et etiam per atoniam debilitatemque, quas inducunt, locum congestionem possunt praeberere. Quinetiam
foetum

foetum in utero adeo violenter agitare possunt, ut pondere suo, si multum magnitudinis ei jam accessit, placentam ab utero possit separare. Exercitatio violenta, praesertim saltatio, eodem modo agere videtur; et igitur nullius explicationis sibi propriae indiget. Vomitus denique gravis, a qua praegnantibus nullo tempore pro certo immunes sunt, effectus suos modo non dissimili edit. Etenim contractiones musculorum abdominis graves movens cursum humorum uterum versus dirigit, foetumque violenter concutit, et ita ut ante diem excludatur facit.

e. Affectus animi concitiores—Hi, ut ira, metus subito incussus, caeterique, moti duo protinus praestant. Prius summum corpus, ut e pallore ei illato conjicere licet, spasmus afficiunt, deinde actionem cordis arteriarumque intendunt. Haec autem sanguinem in vascula cutanea extrema, ob spasmus superficiei, diffundere nequibit; et igitur eum interna, uterum vero potissimum versus, quorsum in praegnantibus cursus ejus semper facillime fit, haud dubie diriget, ubi placentam ab utero sejungere abortumque facere periclitabitur. Insuper, affectus animi vehementiores non tantum corpus gravidæ reliquum, quod plerumque et plenum et irritabile, sed etiam uterum ipsum spasmis

spasmodicis gravissimis nonnunquam affecerunt, qui uterum iterum iterumque constringendo eum et placentam a se invicem separarunt.

f. *Venus immodica*.—Haec cursum sanguinis ad uterum, ut e partibus genitalibus inter coeundum intumescantibus et rigescentibus abunde constat, manifestissime facit. Quod hoc ulterius firmat, est, quod Venus, dum menstrua proveniunt, adhibita ea nimis copiosa reddit, et remedium in auxilium amenorrhoeae promptissimum esse reperitur. Igitur usus ejus in omnibus gravidis, quae abortum fugere volunt, rarus et modicus esse debet.

g. *Alvus dura*.—Cum res ita sese habet, ster-
cus absque nitu violentissimo nequit excerni, qui cursum humorum nimium ad vasa haemorrhoidalia, et omnia quoque vicina, et igitur ad uterina, facit. Quod fidem huic rei haud dubiam facit, est exemplum haemorrhoidis quam alvus astricta saepius, quam ulla alia causa, movere consuevit. Si multum stercoreis indurati in recto extremo diutius justo retineatur, id venas praetera et recti et uteri comprimere, reditumque sanguinis impedire, et idcirco summam in hisce partibus plenitudinem creare potest, quae gravidam periculo abortus objiciet.

h. *Frigus*

h. *Frigus pedibus applicatum*.—Quomodo hoc praegnantem male afficiat, abortuique opportuniorem reddat, non rite intelligo, nisi artuum inferiorum vasa constringendo, quod frigus semper praestat, ut quantitas sanguinis insolita ad uterum mittatur faciat. Per sympathiam, iudicio nonnullorum, uterum adficit; rem vero hoc modo explicare nihil aliud quam plane confiteri se quomodo abortus hoc in exemplo moveatur, ex toto ignorare.

i. *Febres*.—Hae impetum humorum magis minusve adauctum semper excitant; igitur, si febris gravidam corripit, qui impetus adauctus ei nunquam deest, is regionem uterinam versus potissimum dirigi abortumque facere potest. Si abortus vero ab hac causa proficiscatur, aegrotas, uti omnes fere auctores memoriae produnt, plerumque fato concedit.

II. Eae quae tonum vasis uterinis, unde nexus uterum inter et placentam pendet, imminuunt, cujus jactura placentam ab utero haud dubie dividit.

Quae hoc praestant, ea sunt omnia quae laxitatem corporis universam progignunt, ut in cubiculis calidis constanter fere manere, liquores calidos et debilitantes, quales sunt infusa theae et coffeae,

coffae, et caeteri, nimis liberaliter potare, corpus defatigare, magnas sanguinis quantitates amittere, &c. Qua ratione haec et similia corpus relaxent, viresque ei convellant, non opus est ut exponamus, cum nemo, qui medicinam labris primoribus tantum degustavit, hoc possit ignorare. Si vero debilitas reliqui corporis per causas modo positas similesque fuerit facta, non parum periculi est, ne eadem cum utero quoque communicetur, nexumque, qui eum inter et placentam interest, ex toto dissolvat; namque vires reliquis systematis partibus vix possunt imminui, et utero interea integrae et illibatae manere.

Eundem effectum quoque edunt omnia, quae vasa uterina extrema vi nimia tetenderunt, et igitur atoniam illis propriam fecerunt. Hujusmodi sunt abortus crebri antecedentes, puerperium frequens, partus difficiles et protracti.

Quinetiam forsitan uterum gerenti non minori erit noxae cursus sanguinis nimius ab utero ad alias systematis partes factus, qui placentam nutritione sua debita privare, et ita vinculum, quo utero adnectitur, solvere valet.

Idem quoque incidere potest, si foetus, per nodum funis umbilicalis, vel quamlibet aliam causam, morte afficiatur. Et tamen, foetu extincto,

fincto, nec vasa uterina nec placentae propria totum justum diu retentura esse speres.

Multae denique causarum, quae vincula, quibus uterus et placenta inter sese conjunguntur, solvunt mortales adhuc latent, et diu forsitan latebunt; namque labor et opera, quae homines in rerum natura indaganda posuerunt, in nulla alia re, ac in iis quae animalium generationem spectant, aequè inutiliter effusa sunt.

R A T I O S I G N O R U M.

Dorsi, lumborum, ventris dolores. Hi a sanguine in utero praeter consuetudinem congesto haud dubie proficiscuntur; sed in dorso, lumbis, et ventre, quod uterus prope hasce partes situs est, sedere videntur; namque vera doloris fedes per sensum ejus saepissime nequit dignosci. Dolor quidem hoc in exemplo, si accurate loqui velis, a congestione sanguinea uterum sensilem nimis tendente pendet.

Mammæ flaccidiores evadunt et subsidunt. Cum sanguis e vasis praegnantium uterinis non amplius singulis mensibus profunditur, mammae grada-

tim tendi et tumere incipiunt, adeo ut cursus humorum ab utero ad mammas per totum graviditatis decursum, sed potissimum paulo ante partum, fieri videatur. Contra, si aliquae causae cursum sanguinis nimium uterum versus, ut in abortu fit, magna vi dirigunt, mammae ob aequilibrium sanguinis mutatum flaccidiores evadant et subsidant necesse est.

Sanguinis ex utero profusio et regio hypogastrica detumescens.—Si placenta per ullam causam ab utero disjungitur, vasa uterina ostiis patulis hiare incipiunt, et sanguis ex hisce, pro magnitudine vasorum, quae graviditati magis minusve provectae pro rata ratione respondet, parcius liberaliusve prorumpit. Quandocunque vero uterus mole humorum nimia irritatus se contrahere incipit, et muscoli abdominales, per vires naturae medicatrices exfuscitati, auxilium ei ferunt, et, quantum in sese est, ad materiam irritantem expellendam conferunt, foetus os tincae versus et in initium vaginae detruditur, et ut abdomen, quod ante elevavit, detumescat facit.

Reliqua signa per se adeo manifesta et clara sunt, ut nihil explicationis videantur deponere.

P R O G N O S I S.

Si profusio sanguinis fit modica, placenta utero rursus potest adjungi et gravida partum reservare. Effusio, contra, admodum liberalis et subita, foetum brevi exclusum iri significat. Quantum ad matrem attinet, abortus, intra primos quinque menses, ei non saepe exitio est; etenim vasa uterina nondum adeo dilatantur, ut tantum sanguinis effundi sinant, quantum vitam maternam extinguere valet. Si vero, graviditate provectiore, partus alicui elidatur, magnaue sanguinis jactura expulsionem foetus subsequatur, puerpera summo in periculo versatur, et tardius, si ad sanitatem reducatur, quam post partum naturalem, plerumque convalescit. Quantum salutem foetus ipsius spectat, quo plus aetatis ei accessit, eo facilius certiusque vivere consuevit.

R A T I O M E D E N D I.

Consilia autem medendi duo esse videntur :

I. Cursum sanguinis vasa uterina versus factum imminuere.

H. Tonum vasis uterinis, si sit cur morbum a hujus jactura proficisci credamus, reddere.

Quae remedia consilio priori respondent, ea sunt:

a. *Sanguinis missio.*—Si sanguis brachio vel cui-libet alii parti ab utero longe distanti detrahatur, cursus forsitan ab utero avertetur. Ad hoc remedium vero non confugi debet, nisi aegrotā plenitudine laboret, pulsusque arteriarum ei sint validi et celeres. Si pars placentae tantum ab utero sit sejuncta, hoc forsitan sanguinis profusionem sistet, et omnia in melius mutabit. Si vero sanguis copiose et violenter prorumpat, caute debet adhiberi; namque debilitatem, quam profusio nimia jam fecit, augebit, et omnia in pejus ruere coget.

b. *Positura corporis horizontalis.*—Quampri-mum notae abortus sese ostendere incipiunt, aegrotā protinus ad lectum deferenda est, et dor-so, clunibus elevatis, incumbere debet, quod cur-sum humorum aliqua ex parte imminuet.

c. *Summa animi corporisque quies.*—Affectus animi concitatiores impetum sanguinis ad uterum periculosum facere posse supra posuimus; hi igitur

tur summa diligentia vitandi. Nihil omnino, quod metum aegrotanti possit incutere, oculis ejus objiciendum; animus, contra, ei ab omni moestitia quam maxime abducendus, et summa spe omnia ei optime esse cessura fovendus. Quantum ad corpus attinet, minime agitandum, sed in eadem positura immotum continendum.

d. *Accurata corporis refrigeratio.*—Ab omnibus calefacientibus atque stimulantibus caute debet abstineri. Ægrota stragulis quam levissimis operiatur. Cubiculum ejus foco destituatur. Si tempestas aestiva sit, fenestrae recludantur. Cubile non molle, sed durum sit. Epithemata frigida, panni ex. gr. aceto intincti, lumbis et inguinibus saepius superimponantur, et, quoties incaluerint, renoventur. Sitim aegrotanti sedet aqua frigida alicui acido, ut succo aurantiorum, admista, cui nonnihil vini rubri, viribus abortienti magnopere convulsis, potest adjungi. Diaeta laevis sit et quam maxime refrigeret. Alvus per enemata perpetuo soluta teneatur. Denique, ut omnia uno verbo comprehendamus, calorem vix nimis vitare, frigus vix nimis quaerere, valebis.

e. *Ligaturae artubus inferioribus injectae.*—Hae vix venas, arteriis interea liberis, comprime-
re

re possunt. Sin autem arterias pressura ulla afficias, tantum aberis ut cursum sanguinis ad uterum factum imminuas, ut eundem, contra, mag-nopere augeas.

Denique, si nulla remediorum, quorum men-tionem jam fecimus, profusionem sanguinis sistere aut saltem imminuere valebunt, ad opem obste-triciam, omnibus aliis ut inanibus nihilque profi-cientibus repudiatis, protinus decurrendum, et uterus foetu quam maxime cito liberandus, ut tandem sese contrahendo ostia vasis sanguinem profundentibus claudat, morbumque ad finem per-ducatur.

II. Tonum vasis uterinis, si sit cur morbum a hujus jactura proficisci credamus, reddere.

Morbum autem a tono vasorum uteri immi-nuto pendere concludere possumus, si debilitas et laxitas habitus aegrotantis corporei universae subsint, si causae remotae, quae morbum fecerunt, tales sint, quales vires corpori plane convellunt, si signa desint, quae actionem vasis uteri auctam esse significant, si abortiens morbis a mera debi-litate proficiscentibus sit opportuna.

Quae remedia huic consilio accommodantur, ea sequuntur.

a. Omnia remedia, praeter sanguinis missionem, quae consilio priori respondere demonstravimus.

b. *Opiata*.—Si aegrotata non tantum laxa, sed admodum irritabilis esse videatur, ad opium decurrere licet; namque omnis irritatio, pro laxitate systematis, magis minusve nocet, sed profusionem sanguinis augere semper periclitatur. Cautè tamen adhibendum; etenim de effectibus, quos in morbis inflammationem habentibus et haemorrhagiis edat, alii auctores in alias sententias concesserunt.

c. *Astringentia et Tonica*.—Haec, si remedia supra comprehensa nihil profuerint, et sanguis sese liberaliter profundere pergat, sunt adhibenda, et non parum auxilii hoc in exemplo, ubi morbus a laxitate oritur, promittere videntur. Astringentium optimum est alumen, quod variis sub formis fuit adhibitum, et multorum, ut illi fatentur, votis respondit. Insuper, cortex Peruvianus, vi sua tonica jure nobilitatus, ad atoniam vasorum tollendam in primis, uti putes, accommodatur. In usu quoque fuit tinctura rosarum rubrarum, quae, si adhibeatur, quam maxime acida reddi debet. Rosae per se parum valent, et tinctura virtutem suam, si ullam habet, ab acido vitriolico solo

solo deducit. Remedia hujusmodi sub initium nonnihil prodesse possunt. Si vero placenta ab utero, antequam ad ea confugiatur, magna ex parte vel ex toto fuerit disjuncta, haudquaquam prohibere valebunt quo minus foetus intempestive excludatur.

Eadem remedia priori consilio respondere multi sunt opinati, et ea revera adhibuerunt. Quantum ad alumen attinet, vi sua astringente et styptica forsitan proderit. Cortex vero Peruvianus remedium admodum anceps esse videtur; namque periculum non deest, ne tonum vasis, qui hoc in exemplo jam nimius esse videtur, adaugeat, et profusionem sanguinis magis liberalem efficiat.

Omnia denique remedia, quorum hoc in morbo periculum fecerunt medici, in auxilium ejus parum prompta esse saepissime reperiuntur. Igitur fiducia nostra in iis, quae morbo venienti occurrunt, potissimum collocanda.

P R O P H Y L A X I S.

Quo abortui occurratur, omnes causae remotae supra comprehensae sedulo vitentur. Gravi-
da

da intemperantiam omnigenam fugiat, modice bibens et edens. Iis quae ventriculo aliena abstineat, et a ratione vivendi solita quam minime deflectat. Si partus olim ei fuerit elusus, summam, donec tempus periculosum praeterierit, curam adhibeat. Si plena sit, sanguis ei mittatur, parce edat, quiete fruatur. Si debilis sit, ad corticem Peruvianum, amara levia aromatica, aquas minerales, balneum frigidum, si hoc poterit tolerare, confugiat. Aërem purum et inquinamentorum expertem inspiret. Omni ratione animus ei oblectetur, nullaue, quae horrorem possint incutere, oculis ejus objiciantur. Excitationem modicam, sibiue gratam, sed semper citra defatigationem, adhibeat. Inertiam, turbas, salebras inter iter faciendum, navigationem refugiat. Equitatione non abstineat, si equo placido insidere non reformidat. Vestimenta talia sint, qualia nec thoracem nec abdomen nimis constringant. Alvus ei nunquam non soluta teneatur, utpote quae vitiis ventriculi, colicae, aliisque, quae abortum facere possunt, potenter occurrat. Abdomen per ultimos graviditatis menses fasciis idoneis modice sustineatur. Fatigata, etiam interdiu, in cubili subinde requiescat.

